



TEKS UCAPAN



**YB DATO' SERI HAMZAH BIN ZAINUDIN
MENTERI KEMENTERIAN PERDAGANGAN DALAM NEGERI,
KOPERASI DAN KEPENGGUNAAN**

MAJLIS PENUTUP KURSUS ASAS PENGUATKUASAAN SIRI 1/2016

**DI PUSAT LATIHAN PASUKAN GERAKAN AM,
ULU KINTA, PERAK**

23 MEI 2016

Bismillahirrahmanirrahim.

Assalamualaikum warahmatullahi wabarakatuh.

Salam sejahtera, salam 1Malaysia.

Terima kasih, Pengacara Majlis.

Yang Berbahagia Dato' Sri Jamil Bin Salleh,

Ketua Setiausaha Kementerian

Yang Berusaha Tuan Mohd Roslan Bin Mahayudin,

Pengarah Penguatkuasa KPDNKK

Yang Dihormati Supt. Hj. Rusli Bin Hj. Abas,

Komandan Pusat Latihan PGA

Yang Dihormati Dsp. Saifuddin Bin Mohamed Nasir,

Timbalan Komandan Pusat Latihan PGA

Pengarah-pengarah Negeri dan Pegawai-pejawai Kanan Kementerian,

Dato'- dato' / Datin - datin,

Tuan-tuan dan puan-puan para hadirin sekalian.

1. Alhamdulillah, terlebih dahulu kita bersyukur kehadrat Ilahi, kerana dengan limpah kurnia dan inayahNya dapat kita pada hari ini bersama-sama berkumpul dalam Majlis Penutup Kursus Asas Penguatkuasaan Siri 1/2016. Saya juga terharu melihat kesungguhan ibu bapa dan ahli keluarga yang hadir bagi sama-sama meraikan majlis ini. Saya merakamkan ucapan terima kasih atas jemputan ini.
2. Saya mengucapkan tahniah dan terima kasih kepada Bahagian Penguatkuasa dan Komandan Pusat Latihan PGA serta seluruh warga Pusat Latihan PGA terutamanya pegawai-pegawai dan jurulatih-jurulatih yang memberi khidmat bakti untuk menjayakan kursus asas ini.
3. Kursus yang dilaksanakan ini adalah merupakan kursus wajib yang harus dilalui setiap pegawai penguatkuasa yang baru dilantik. Ia merupakan latihan dan pendedahan yang komprehensif berkaitan dengan tugas-tugas penguatkuasaan.
4. Saya ingin menyeru pegawai-pegawai baru ini agar mempersiapkan diri sepenuhnya kerana tugas yang menanti di lapangan bakal menjadi cabaran baru dalam kehidupan tuan-tuan. Tugasan sebagai pegawai penguatkuasa semakin mencabar serta memerlukan ketahanan mental dan fizikal. Justeru saya berharap kursus ini sedikit sebanyak dapat memberi gambaran apa yang akan berlaku nanti dan tuan-tuan boleh menyesuaikan diri dengan suasana itu kelak. Latihan seperti berkawad, jasmani dan latihan menembak, ia diwujudkan untuk membentuk semangat setiakawan, meningkatkan disiplin dan patuh kepada setiap arahan yang diberi.

Tuan-tuan dan puan-puan para hadirin sekalian.

5. Kerjaya sebagai pegawai penguatkuasa KPDNKK semakin hari semakin mencabar dan menuntut pengorbanan yang tinggi daripada kalangan anggotanya, terutamanya

dalam isu menangani kenaikan kos sara hidup, persepsi orang ramai yang mengaitkan tentang ketelusan dan keberkesanan tugas yang dijalankan oleh pegawai-pegawai penguatkuasa KPDKKK. Harus dibuktikan dengan profesionalism kita ketika menjalankan tugas. Ini merupakan amanah dan tanggungjawab yang diberikan kepada kita sebagai penjawat awam. Gunakanlah segala ilmu yang dipelajari sepanjang tempoh kursus asas ini sebagai pemangkin kepada anda semua untuk memberi perkhidmatan yang terbaik kepada rakyat.

6. Saya ingin tegaskan walaupun tuan-tuan dan puan-puan telah menamatkan kursus asas ini, namun tidak bermakna ini adalah noktah kepada proses pembelajaran, teruskanlah proses pembelajaran ini. Tuan-tuan dan puan-puan digalakkan mengambil pengalaman dan menuntut ilmu daripada pegawai-pegawai yang lebih berpengalaman. Perkongsian ilmu ini boleh digunakan semasa tuan-tuan berhadapan dengan masyarakat nanti.

7. Hari ini, kita dapat menyaksikan seramai 116 pelatih yang segak dan kemas telah berjaya mengharungi kepayahan dan kesukaran yang ditempuh semasa latihan. Saya dimaklumkan daripada 116 pelatih di hadapan saya ini, 84 pelatih adalah lelaki dan 32 pelatih perempuan. Mereka ini adalah pegawai penguatkuasa gred N41 dan penolong pegawai penguatkuasa gred N27 lantikan tahun 2014. Hari ini merupakan hari yang bersejarah dan titik permulaan bagi tuan-tuan dan puan-puan untuk mengorak langkah menjadi modal insan yang amat bernilai pada Kementerian dan rakyat. Jangan jadikan kerjaya sebagai pegawai penguatkuasa ini sekadar batu loncatan dan tiada peluang kerja lain.

8. Tuan-tuan dan puan-puan harus rasa bersyukur kerana bertuah menjadi warga KPDKKK daripada beribu-ribu permohonan yang diterima. Sifat syukur harus sentiasa ditanam dalam diri setiap warga KPDKKK berbanding mereka di luar sana yang masih lagi tercari-cari peluang pekerjaan. Anggaplah tanggungjawab yang digalas ini sebagai amanah ibu bapa tuan-tuan dan puan-puan yang hadir pada hari ini.

Tuan-tuan dan puan-puan hadiri sekalian.

9. Bagi tujuan untuk mempertingkatkan tahap kompetensi pegawai-pegawai penguatkuasa dengan kemahiran (*skill*), pengetahuan (*knowledge*) dan sikap (*attitude*) di

dalam melaksanakan tugas penguatkuasaan, saya difahamkan pihak pengurusan Bahagian Penguatkuasa sedang menyiapkan Pelan Operasi Latihan (POL) 2016 hingga 2020. Pol ini dibangunkan sebagai persediaan untuk pegawai-pegawai penguatkuasa berhadapan dengan perkembangan pesat dalam semua sektor yang menyebabkan aktiviti jenayah perdagangan menjadi semakin canggih dan licik.

10. Pelan operasi ini juga akan dibentuk selari dengan hasrat Bahagian untuk mewujudkan **Akademi Penguatkuasaan Perdagangan (APP)**. Di antara bidang pengajian APP yang dikenalpasti adalah:-

- Perundangan;
- Pengurusan dan pentadbiran penguatkuasaan;
- Pengurusan strategik penguatkuasaan;
- Kepimpinan penguatkuasaan;
- Kemahiran komunikasi;
- Sahsiah diri dan amalan etika profesional; serta
- Sains sukan.

11. Dengan penubuhan akademi, saya berharap kita dapat arahkan pegawai penguatkuasa lantikan baru terus melaporkan diri bagi menjalani kursus sebelum diberi penempatan. Ini adalah bagi mengelakkan kejutan "budaya kerja" kepada pegawai-pegawai baru yang dilantik dan apabila ditugaskan mereka dapat melakukan tugas dengan sempurna melalui ilmu serta pemahaman semasa menjalani kursus. Dengan adanya akademi ini juga diharapkan agar pegawai-pegawai penguatkuasa lantikan baru akan dilatih secara profesional dan sistematik.

12. Selain daripada itu Bahagian Penguatkuasa dan Bahagian Pengurusan Sumber Manusia dengan kerjasama Universiti Pertahanan Nasional Malaysia (UPNM) sedang mengusahakan projek **menaiktaraf kursus asas pegawai-pegawai penguatkuasa yang sedia ada di seluruh negara**. Kursus tersebut akan berasas kepada bidang pengajian yang telah direkabentuk dalam POL. Tempoh masa kursus asas ini akan dipanjangkan di antara 3 hingga 4 bulan. Penekanan yang akan diberi dalam kursus asas baru ini adalah daripada aspek penyiasatan dan pembentukan sahsiah diri.

13. Mengakhiri ucapan, saya sekali lagi mengucapkan tahniah dan syabas kepada semua pelatih yang telah berjaya menamatkan kursus asas ini dengan cemerlang. Di samping itu juga saya sekali lagi mengucapkan setinggi-tinggi penghargaan kepada Bahagian Penguatkuasa, KPDKKK bersama-sama dengan Pusat Latihan PGA serta semua pihak yang bersama-sama menjayakan Kursus Asas Penguatkuasaan Siri 1 Tahun 2016.

14. Saya dengan lafaz bismillahirrahmanirrahim merasmikan **Majlis Penutup Kursus Asas Penguatkuasaan Siri 1/2016**

Sekian, wabillahitaufik walhidayah wassalamu'alaikum warahmatulahi wabarakatuh.